

Selamat Berhari Raya

Aidil Fitri

Min al-‘Ā’idīn al-Fā’izīn

Alangkah hebatnya rasa yang dinikmati oleh umat Islam pada 1 Syawal, tahun kedua Hijrah, kerana waktu itulah terlaksananya hari raya Aidil Fitri ini. Di bawah naungan tombak dan panah, di dalam suasana perang, menangkis, menyerang dan memerangi kejahatan kaum Musyrikin yang berniat hendak mematahkan agama Allah itu, puasa Ramadan diwajibkan, dan zakat juga diwajibkan.

Allāhu Akbar, Allāhu Akbar wa lillāhi al-hamd

Suara takbir bergema memuji Allah ‘azza wa jalla. Tidak ada yang terasa hanya kebesaran Allah dan kemurahan-Nya.

Mulai terbenam matahari akhir Ramadan dan datangnya

malam 1 Syawal, suara takbir kedengaran di mana-mana.

Dalam masjid, di dalam rumah, di pasar, di atas kenderaan, dalam berjalan, yang kedengaran hanya suara takbir memuji Allah ‘azza wa jalla. Semua berhari raya, semua mengharap

ampun dosa, semua mengharap keredhaan Allah Ta‘ālā.

Kita bertanya di hati, apakah sebabnya Allah ‘azza wa jalla

menurunkan perintah puasa itu dalam suasana negara

sedang berperang, padahal puasa itu melemahkan diri

dan peperangan itu pula meminta kekuatan. Hal ini jika

difikirkan dari segi kebendaan adalah berlawanan dengan

perhitungan perang yang sangat memerlukan tenaga, tetapi Allah

yang Maha Mengetahui menurunkan perintah puasa pada saat

yang genting itu sudah tentu ada rahsia hidup yang

penting pula.

Masa yang akan ditempuh umat Islam itu ialah

masa kemenangan dan masa kekuasaan, rakyat akan bertambah ramai, negara akan bertambah luas, kekayaan berlimpah ruah, keselamatan rakyat wajib terjamin, pemerintah mesti kuat dan adil.

Puasa diperintahkan kepada Nabī melaksanakannya, umat mengikuti dengan taat, maka dengan itu puasa membisikkan kepada hati, bahawa jiwa dan tubuhmu kepunyaan Allah, kekayaan bumi dan langit ialah kepunyaan-Nya.

Bisikan ini diikuti oleh aturan supaya

orang Islam yang mampu memberi makan kepada si miskin

dan anak yatim (itulah pokok keadilan) sehingga

menumbuhkan pembinaan dan kemakmuran negara. Tidak

dibenarkan hidup melonggok-longgokkan harta kerana sifat

itu akan menumbuhkan bencana, pemerintah yang adil

akan berubah sifat menjadi pemeras, rakyat akan bertambah

sengsara, keaniana akan menjadi-jadi, tipu daya akan

tumbuh dengan hebatnya. Akhirnya undang-undang tidak berdaya,

pemerintah lemah, jaminan harta tidak ada, jaminan diri

lenyap, jaminan hidup lesap.

Oleh kerana itu Allah mewajibkan puasa bagi membentuk umat (pemerintah dan rakyat) dalam satu sifat yang menjamin keselamatan umat yang berada dalam wilayah-Nya.

Alangkah hebatnya Nabī dan umat bersama-sama taat akan peraturan yang sama. Nabī berpuasa umat berpuasa, Nabī sebagai Rasul Ilahi menjalankan perintah bersama-sama dengan umat, apa yang dikatakannya dijalankannya sehingga umat mendapat perpegangan yang teguh, undang-undang berjalan seluruhnya. Umat merasa berpahala mengerjakan perintah-Nya walaupun nafsu mengganggu dengan tidak bosan-bosannya. Dan

melandu nafsu itulah jalan ke Tuhan, dan itulah yang disebut takwa.

Allah Maha Besar, itulah pedoman yang diberikan oleh Allah Ta‘ālā untuk alam manusia.

Kita telah menerima kedatangan Ramadan dengan penuh khusyuk, kita berpuasa siang dan beribadat malam, suara bacaan *al-Qur‘ān* kita dengungkan, nasihat Nabī kita Dengarkan, dengan demikian kita mengharap kemurahan Allah pada hari raya Aidil Fitri, mengharap pertolongan Allah supaya dijauhkan-Nya bala bencana daripada menimpa diri kita dan negara kita.



Pelajar-pelajar kelas Tiga Petang Asuhan Islam – al-Ihya’ al-Sharif, bergambar untuk kenangan bersama-sama dengan gurunya dihadapan sekolahnya kerana menyambut cuti persekolahan. Duduk nombor tiga dari kiri saudara-saudara:

Yusuf Dahlan – Guru Bahagian Seni, Ahmad Dahari – Bahagian Sejarah, Syarifuddin – Guru Besar,

Haji Damanhuri Haji Abdul Salam – Bahagian Agama dan Haji Amin Husin - ‘Arabiyyah. Kiriman gambar Haniba.